



## Samþykktir fyrir Myndhöfundasjóð Íslands – Myndstef

### 1.gr. Tilgangur.

Myndstef eru hagsmunasamtök á sviði höfundaréttar að myndverkum og gegnir því hlutverki að vernda höfundarétt félagsmanna vegna birtingar á verkum þeirra til almennings og vegna annarrar hliðstæðrar notkunar. Félagsmenn samtakanna eru þeir sem afhent hafa Myndstef þartilgreint umboð, annað hvort í gegnum einstaklingsaðild eða í gegnum aðild að aðildarfélögum Myndstefs. Umboð þetta veitir Myndstef heimild til að gera heildarsamninga á grundvelli samningskvaðar, sbr. 12.gr. b. og 3. mgr. 14. gr. höfundalaga, sem og rétt til gæslu á notkunar- og birtingarrétti myndverka höfundar sem þegar hafa verið birt. Heimili Myndstefs og varnarþing er í Reykjavík.

Verkefni samtakanna auk almennrar höfundaréttargæslu fyrir félagsmenn skal vera að safna upplýsingum eða fá ábendingar um endurnotkun tiltekinna myndverka félagsmanna, koma á fót skrifstofu og vinnukerfi til þess að innheimta þóknun fyrir þessa notkun og koma henni til skila til félagsmanna og hafa með höndum gerð gjaldskrár og taxta í því sambandi. Gjaldskrá Myndstefs er birt á heimasíðu samtakanna, [www.myndstef.is](http://www.myndstef.is), og skal endurskoðuð fyrir aðalfund ár hvert og staðfest þar. 100% álag leggst ofan á gjaldskrá í þeim tilfellum sem not samrýmast ekki skilmálum gjaldskrár, brjóta á sæmdarrétti eða eru að öðru falli óheimil. Þau tilfelli sem falla utan gjaldskrár skal semja um sérstaklega.

Myndstef tekur einnig að sér innheimtu höfundapóknunar utanfélagsmanna í þeim tilvikum sem gerðir eru samningar um greiðslur fyrir afnot myndverka og ábyrgist jafnframt skil þeirra gjalda til viðkomandi höfunda, þannig að þeir verði jafnsettir félagsmönnum hvað innheimtu og skil þessara gjalda varðar. Vísast í því sambandi m.a. til 12. gr. b. og 14. gr. höfundalaga. Enn fremur hefur Myndstef heimild til að veita samningskvaðaleyfi á grundvelli 2. mgr. 26. gr. a., að nánari skilyrðum uppfylltum og ef viðurkenning fæst sbr. 2.-4. mgr. sömu greinar.

Myndstef tekur að sér að innheimta fylgiréttargjöld vegna endursölu listaverka í atvinnuskyni. Stjórninni er heimilt að yfirtaka verkefni Myndlistarsjóðs Íslands í þessu skyni sbr. 25. gr. b höfundalaga 73/1972 eins og henni var breytt með lögum nr. 57 frá 1992, svo og skv. 5. kafla, (sbr. 6. mgr. 23. gr) laga um verslunaratvinnu nr. 28/1998. Um innheimtu þessara gjalda gilda einnig ákvæði reglugerðar nr. 486/2001.

Ennfremur að hafa með höndum samskipti við hliðstæða erlenda aðila og koma fram fyrir hönd félagsmanna gagnvart Fjölís og öðrum höfundasamtökum í samræmi við tilgang félagsins.

Þá er það og verkefni félagsins að fylgjast grannt með þróun laga, reglna og viðskiptahátta á þessu sviði og annast samningagerð félagsmanna við opinbera- og einkaaðila um höfundaréttarleg hagsmunamál félagsmanna vegna opinberrar birtingar og notkunar á myndverkum þeirra.

Félagsmönnum er ekki skylt að fela Myndstefi neina aðra hagsmunagæslu á höfundaréttarsviði nema hvað varðar endurbirtingar á myndverkum og aðra hliðstæða notkun. Enn fremur geta höfundar bannað notkun verka sinna alfarið, og að hluta, og skal tilkynna Myndstef um slíkt.

## **2. gr. Aðild.**

Stofnendur Myndstefs eru Samband íslenskra myndlistarmanna, Félag íslenskra teiknara, Félag grafískra teiknara og Ljósmyndarafélag Íslands.

Rétt til inngöngu í félagið eiga hagsmunasamtök og stofnanir sem fara með höfundarétt að myndverkum eins og skilgreint er í 1. mgr. 1. gr. hér að framan. Fulltrúaráð fjallar um þær aðildarumsóknir og þarf samþykki 2/3 hluta aðildarfélaga til þess að aðild teljist samþykkt.<sup>1</sup>

Aðilar ofangreindra félaga teljast fullnægja skilyrðum um félagsaðild að Myndstefi. Myndhöfundar geta einnig verið utan félags og öðlast svokallaða einstaklingsaðild, ef þeir eiga hagsmuna að gæta vegna birtingar og annarrar hliðstæðrar notkunar á myndverkum þeirra.

Félagsmenn Myndstefs skulu undirrita þartilgreint umboð sem tilgreinir hvers efnis Myndstef skuli fara með réttindi tengd endurnotkun verka eða höfundarétti þeirra. Umboð þetta má nálgast rafrænt á heimasíðu Myndstefs og tryggir undirritun félagsaðild í samræmi við hlutverk og skyldur Myndstefs, auk aðgangs að ókeypis lögfræðipjónustu.

Rétthafar eða erfingjar látinna listamanna skulu einnig skila inn sérstöku umboði til Myndstefs, eftir að hafa sammælast um hver þeirra komi fram fyrir hönd erfingja, ef þeir eru fleiri en einn. Umboð þetta fellur sjálfkrafa úr gildi 70 árum eftir lát höfundar.

Fulltrúaráðið getur ákveðið að þeir sem eiga einstaklingsaðild að Myndstefi myndi hóp og tilnefni fulltrúa í fulltrúaráð Myndstefs, sbr. 3. gr. Hið sama gildir um aðild erfingja og annarra rétthafa sem hafa öðlast höfundarétt við gjöf eða erfðir.

Heimilt er að segja sig úr félaginu en til þess að úrsögn sé gild þarf hún að berast stjórn með minnst 6 mánaða fyrirvara miðað við áramót. Að auki hefur stjórn heimild til að synja félagsmanni um einstaklingsaðild, ef hann uppfyllir ekki skilyrði um aðild, og jafnframt víkja félagsmanni úr samtökunum hafi hann gerst brotlegur við samþykktir þessar eða aðildarumboð.

## **3. gr. Fulltrúaráð.**

Hvert aðildarfélag tilnefnir einn aðalmann í fulltrúaráð Myndstefs. Aðildarfélög tilkynna tilnefningu fulltrúa skriflega til Myndstefs og gildir hún þar til hún er afturkölluð skriflega. Endurskoða skal heildarfjölda fulltrúaráðs ef fulltrúafjöldi er kominn yfir 20 manns.

Aðalverkefni fulltrúaráðsins eru að fjalla um starf og stefnu Myndstefs, sbr. 1. gr. samþykktar þessarar. Ennfremur skal ráðið hafa eftirlit með starfsemi félagsins, sem og kjósa/tilnefna 2 stjórnarmenn í stjórn Myndstefs. Tillögur til tilnefningar stjórnarmanns skulu berast skrifstofu Myndstefs tímanlega fyrir aðalfund ár hvert.

Fulltrúaráð tilnefnir sér sjálft formann. Formaður stjórnar fundum fulltrúaráðs og verður ekki ályktað á fulltrúaráðsfundi um mál sem ekki er getið í fundarboði. Afl atkvæða ræður úrslitum sé annað ekki sérstaklega ákveðið. Fundargerðir skulu færðar í gerðarbók.

---

<sup>1</sup>Aðildarfélög Myndstefs eru: Arkitektafélag Íslands, Fatahönnunarfélag Íslands, Félag húsgagna og innanhúsarkitekta, Félag leikmynda- og búningahöfunda, Félag íslenskra gullsmíða, Félag íslenskra landslagsarkitekta, Félag íslenskra myndlistarmanna, Félag íslenskra samtímaljósmyndara, Félag íslenskra teiknara, Félag vöru- og iðnhönnuða, Grafía, Hönnunarmiðstöð Íslands, Íslensk grafík, Leirlistafélagið, Ljósmyndarafélag Íslands, Myndhöggvarafélagið, Myndlistarfélagið, Samband íslenskra myndlistamanna, Textílfélagið.

Fulltrúaráðið skal koma saman til fundar minnst eini sinni á ári, á aðalfundi. Ella skal halda fulltrúaráðsfundi þegar stjórn eða a.m.k. tvö aðildarfélög óska þess. Fulltrúaráðið skal boðað til funda skriflega með minnst 2 vikna fyrirvara. Geta skal dagskrár í fundarboði.

#### **4 . gr. Stjórn.**

SÍM, Hönnunarmiðstöð Íslands og Ljósmyndarafélag Íslands kjósa/tilnefna þrjá stjórnarmenn úr sínum röðum - einn úr röðum ljósmyndara, einn úr SÍM (Sambandi íslenskra myndlistarmanna) og einn meðlim úr Hönnunarmiðstöð. Stjórn skipar þá 5 stjórnarmenn í heildina, 3 kosnir samkvæmt ofangreindu, auk þeirra tveggja meðlima sem fulltrúaráð hefur kosið. Hver meðlimur stjórnar skipar sér varamann. Formaður er kosinn af stjórn á fyrsta stjórnarfundum eftir aðalfund.

Stjórnin stýrir starfsemi Myndstefs. Boðað skal til stjórnafunda með þriggja daga fyrirvara skriflega og greina frá fundarefni. Skyld er að halda stjórnarfund ef formaður eða tveir stjórnarmenn óska þess, eða ef formleg beiðni þess efnis kemur frá fulltrúaráði. Stjórnarfundur er löglegur ef löglega er til hans boðað og meirihluti stjórnarmanna og/eða varamanna sækir fund. Afl atkvæða ræður úrslitum mála á stjórnarfundum. Fundargerðir stjórnafunda skulu skráðar í gerðarbók.

Stjórnin sér um daglegan rekstur Myndstefs og getur í því sambandi tekið ákvörðun um rekstur skrifstofu og gert samninga um starfsmannahald, t.d. ráðið til sín framkvæmdastjóra sem sér um daglegan rekstur, annast fjárreiður sambandsins, bókhald, bréfaskriftir og annað sem hér að lýtur, sem og lögfræðing sem annast samninga og rágjöf við félagsmenn. Einnig tekur stjórnin lokaákvæðanir hvað varðar ábendingar eða kvartanir frá félagsmönnum eða meðlimum fulltrúaráðs sem lúta að starfsemi Myndstefs, úthlutun eða öðru tengt rekstri eða verklagi samtakanna. Stjórnin skipar fulltrúa til setu í stjórnnum, ráðum og nefndum sem Myndstef kann að eiga aðild að. Atkvæði formanns ræður úrslitum ef atkvæði falla jöfn.

Fulltrúaráð hefur rétt til að skipa áheyrnarfulltrúa til setu á stjórnarfundum með málfrelsi og tillögurétt, ef þess telst sérstaklega þörf, svo og starfsmenn félagsins sem hafa sams konar rétt til fundarsetu á stjórnarfundum.

#### **5. gr. Aðalfundur.**

Aðalfundur skal haldinn að vori ár hvert og ekki seinna en í júnílok. Aðalfundur er löglegur sé löglega til hans boðað. Rétt til setu á aðalfundi hafa allir sem eru fullgildir félagar samkvæmt skráum félagsins.

Aðalfundur skal auglýstur með góðum fyrirvara.

Dagskrá aðalfundar skal vera eftirfarandi:

1. Stjórnarformaður flytur skýrslu stjórnar.
2. Endurskoðaðir reikningar lagðir fram til afgreiðslu.
3. Formaður fulltrúaráðs leggur fram árlega eftirlitsskýrslu fulltrúaráðs.
4. Kosning og tilnefning stjórnar og varamanna lögð fram.
5. Gjaldskrá Myndstefs lögð fram til afgreiðslu.
6. Tilnefning tveggja endurskoðenda og skal a.m.k. annar þeirra vera löggiltur endurskoðandi.
7. Önnur mál.

Allar ákvæðanir á aðalfundi verða að hljóta einfaldan meirihluta greiddra atkvæða.

#### **6. gr. Fjármunir.**

Þeim fjármunum sem samtökin innheimta skal úthlutað til þeirra höfundaréttahafa sem hlut eiga að máli að svo miklu leyti sem það er unnt og eftir að dreginn hefur verið frá kostnaður vegna innheimtu. Aðra fjármuni sem eðli máls samkvæmt verður ekki úthlutað einstaklingsbundið er stjórninni heimilt að ráðstafa til úthlutunnar styrkja til starfandi myndhöfunda eftir að dreginn hefur verið frá kostnaður

vegna reksturs samtakanna. Jafnt félagsmenn sem utanfélagsmenn geta sótt um í styrktarsjóðinn. Stjórnin skipar úthlutunarnefnd sem ákveður styrki í samræmi við úthlutunarreglur. Stjórnin skal hafa samráð við löggiltan endurskoðanda samtakanna áður en ákvörðun er tekin um árlega fjárupphæð sem ráðstafa á til styrkúthlutunar.

Stjórnin getur tekið ákvörðun um úthlutun styrkja til aðildarfélaga samtakanna í sérstök verkefni á þeirra vegum.

### **7. gr. Ágreiningsmál.**

Öllum ágreiningsmálum sem upp kunna að koma vegna ákvörðunar stjórnar um meðferð og skiptingu fjármuna félagsins skal vísað til sérstaks gerðardóms enda hafi áður verið fjallað um ágreininginn í fulltrúaráði og stjórn. Gerðardómur úrskurðar ennfremur í málum sem lúta að synjun á aðildarumsóknum svo og ágreiningsmálum milli aðildarfélaga um skilning á samþykktum Myndstefs.

Stefnu til gerðardóms skal senda í síðasta lagi tveimur mánuðum eftir afgreiðslu stjórnar á ágreiningsmáli og tilkynningu til aðila um úrslit þar um. Að öðru leyti gilda um málsmeðferð reglur í lögum um meðferð einkamála í héraði. Ofangreindur gerðardómur skal þannig skipaður að yfirborgardómari í Reykjavík tilnefnir þrjá dómendur til tveggja ára í senn þar af a.m.k. tvo lögfræðinga og skal annar þeirra vera sérfróður á sviði höfundaréttar.

### **8. gr. Gildistaka.**

Samþykktir þessar taka gildi þegar þær hafa verið samþykktar með meirihluta atkvæða á fyrsta fulltrúaráðsfundi. Til breytinga á þeim þarf 3/4 hluta atkvæða á aðalfundi fulltrúaráðs enda séu mættir þar fulltrúar fyrir 4/5 hluta aðildarfélaganna. Slíta skal félaginu ef þess er krafist af 3/4 hluta aðildarfélaga og krafan samþykkt á fulltrúaráðsfundi með atkvæðum 3/4 hluta allra aðildarfélaganna.

**Reykjavík, 26. febrúar, 1993**

**Samþykktum breytt 12. september 2018.**